

**Muhtasari**


- Vipindi vya hali ya ukavu vinatarajiwa kusaidia kukomaa, uvunaji na uhifadhi wa mazao.
- Athari zitokanazo na uvamizi wa viwavi jeshi zinaweza kuhatarisha usalama wa chakula katika maeneo yaliyoathirika.

**MIFUMO YA HALI YA HEWA KATIKA KIPINDI CHA JUNI 01-10, 2018**

**K**atika kipindi hiki cha siku kumi zilizopita (dekadi) migandamizo mikubwa ya hewa iliyo kaskazini mwa dunia (Azores na Siberia) iliendelea kudhoofika wakati ile iliyopo sehemu ya kusini mwa dunia (St. Helena na Mascarene) iliendelea kuimarika. Ukanda wa mvua (ITCZ) ulielekea kaskazini zaidi. Joto la bahari katika maeneo ya kusini magharibi mwa bahari ya Hindi lilikuwa la wastani na kusababisha kutokuwepo kwa vimbunga baharini. Upepo ulivuma kutoka kusini hadi kusini mashariki katika maeneo mengi ya nchi. Eneo la Kusini mashariki mwa bahari ya Atlantiki (karibu na pwani ya Angola) kuliendelea kuwepo na joto la bahari la wastani hadi juu kidogo ya wastani. Hali hii ilisababisha kupunguza mifumo ya kusababisha mvua katika maeneo ya magharibi mwa nchi

**MWENENDO WA MVUA KATIKA KIPINDI CHA JUNI 01-10, 2018**

**K**atika kipindi cha siku kumi zilizopita, vipindi vifupi vya mvua zimeendelea katika baadhi ya maeneo yanayopata misimu miwili ya mvua hususani maeneo ya nyanda za juu kaskazini pamoja na maeneo ya ziwa Victoria. Hata hivyo maeneo mengi ya nchi yalipata mvua kati ya 0 mpaka 10mm kama inavyoonekana kwenye kielelezo chini.



Kielelezo Na. 1. Kiasi cha mvua kipindi cha tarehe 01-10, Juni, 2018.

**TATHMINI YA HALI YA KILIMO KATIKA KIPINDI CHA JUNI 01-10, 2018**

**K**atika kipindi cha dekadhi iliyopita, baadhi ya maeneo yanayopata msimu mmoja wa mvua wakulima waliendelea na shughuli za uvunaji wa mahindi. Isipokuwa katika mikoa ya Njombe, Mbeya, Iringa na Singida, ambapo mahidi yalikuwa katika hatua ya kukomaa. Maharage yapo katika hatua ya kukomaa mkoani Mbeya, na Ngano ipo hatua ya kubeba katika mikoa ya Iringa, Mbeya, na Njombe.

Maeneo yanayopata misimu miwili ya mvua maharage yanaendelea vizuri na yameanza kuvunwa. Mahindi yapo katika hatua ya kubeba.

Mpunga unavunwa katika mikoa ya Tabora, Rukwa, Mwanza, Tanga na Manyara. Wakati huo huo, wakulima wanaendelea na uvunaji wa pamba katika mikoa ya Kigoma, Mwanza na Shinyanga.

Imetaarifiwa kuwepo kwa athari kubwa za Viwavi jeshi katika mikoa ya Morogoro, Manyara, Mara na Arusha. Hali ya maji na malisho kwa ajili ya wanyama ilikuwa ya kuridhisha isipokuwa mkoa wa Dodoma ambapo maji yameanza kupungua

**HALI YA MAJI ILIVYOKUWA KATIKA KIPINDI CHA JUNI 01-10, 2018**

**K**ina cha maji katika mabwawa, mabonde na mtiririko wa maji katika mito ilikuwa ya wastani, isipokuwa bonde la ziwa Victoria na Pangani ambapo hali ya maji inaonesha kuwa nzuri zaidi.

**MIFUMO YA HALI YA HEWA  
INAVYOTARAJIWA KATIKA KIPINDI CHA  
JUNI 11-20, 2018**

**K**atika kipindi hiki, Migandamizo mikubwa iliyopo kaskazini mwa dunia (Azore na Siberia) inatarajiwa kuendelea kudhoofika wakati ile iliyopo kusini (St. Helena na Mascarene) inatarajiwa kuendelea kuimarika. Ukanda wa mvua (ITCZ) unatarajiwa kuendelea kusogea kuelekea kaskazini hali itakayopelekea upepo kuvuma kutoka kusini hadi kusini mashariki katika maeneo mengi ya nchi. Joto la bahari la wastani hadi chini ya wastani linatarajiwa katika eneo la kusini magharibi mwa bahari ya Hindi, hali itakayopunguza uwezekano wa kutokea vimbunga baharini. Upepo unatarajiwa kuvuma kutoka kusini hadi kusini mashariki hali itakayopelekea hali ya baridi katika baadhi ya maeneo hasa yale yaliyoko kusini mwa nchi. Eneo la Kusini mashariki mwa bahari ya Atlantiki (karibu na pwani ya Angola) kunatarajiwa kuwa na joto la bahari la wastani hadi juu kidogo ya wastani. Hali hii itapelekea kupunguza upepo uvumao kutoka magharibi hivyo kupunguza nguvu ya mifumo isababishayo mvua katika maeneo ya magharibi mwa nchi.

**HALI YA HEWA INAVYOTARAJIWA KATIKA  
KIPINDI CHA MEI 11-20, 2018**

**K**atika kipindi cha siku kumi zilizopita Kanda ya ziwa Victoria (Mikoa ya Kagera, Geita, Shinyanga, Mwanza, Simiyu na Mara) inatarajiwa kuwa na vipindi vya mvua zinazoambatana na ngurumo za radi katika maeneo machache.

Nyanda za juu kaskazini mashariki (Mikoa ya Arusha, Manyara na Kilimanjaro); Kanda ya kusini (Mkoa wa Ruvuma na Maeneo ya kusini mwa Morogoro) na nyanda za juu kusini magharibi (Mikoa ya Rukwa, Songwe, Mbeya, Njombe na Iringa) inatarajiwa kuwa na mawingu kiasi kwa ujumla.

Pwani ya kaskazini (Mikoa ya Tanga, Maeneo ya kaskazini mwa Morogoro, Pwani na Dar es Salaam pamoja na visiwa vya Unguja na Pemba) na Pwani ya kusini (Mikoa ya Mtwara na Lindi) inatarajiwa kuwa na mvua nyepesi katika maeneo machache.

Magharibi mwa nchi (Mikoa ya Kigoma, Katavi na Tabora) na Kanda ya kati (Mikoa ya Dodoma na Singida) inatarajiwa kuwa na mawingu kiasi.

**MATARAJIO NA USHAURI WA KILIMO KATIKA  
KIPINDI CHA JUNI 11-20, 2018**

**H**ali ya ukavu inayotarajiwa itasaidia kukomaa kwa mazao, ukaushaji, uvunaji na uhifadhi wa mazao. Athari zitokanazo na shambulio la viwavijeshi kwa wilaya za Arumeru na Kilosa, na mikoa ya Mara na Manyara zinatarajiwa kuathiri usalama wa chakula katika maeneo hayo. Wakulima katika maeneo hayo wanashauriwa kuweka akiba ya ziada ya chakula kuepuka janga la njaa.

Hali ya maji pamoja na malisho vinatarajiwa kuwa katika hali nzuri na utoshelevu katika maeneo mengi ya nchi. Hata hivyo, wakulima, wavuvi na wafugaji wanashauriwa kuwasiliana na maofisa ugani kwa ajili ya kupata ushauri na matumizi sahihi ya utabiri huu.

**HALI YA MAJI INAVYOTARAJIWA KATIKA  
KIPINDI CHA JUNI 11-20, 2018**

**K**ina cha maji katika mabwawa na mtiririko wa maji kwenye mito vinatarajiwa kuwa vya wastani katika sehemu nyingi nchini. Hata hivyo, wananchi wanashauriwa kutumia maji kwa uangalifu kwa matumizi endelevu ya rasilimali hii.

*Jarida limetayarishwa na:*

Mamlaka ya Hali ya Hewa Tanzania  
Ghorofa ya 3 -Ubungo Plaza - Barabara ya Morogoro, Dar es Salaam-Jamhuri ya Muungano wa Tanzania